



Die Rietstok

21ste Nuusblad van Streek Rietvallei
November 2012

Kersboodskap 2012

Ja kan jul glo, Kersfees is om die draai en saam met die vooruitsig, kom vakansie verwagtinge soos rus, kuier, swem en die natuurskoon geniet. Vir die wat wel kan weggaan, geniet dit, en die wat werk en of by die huis bly, geniet dit.

Die jaar het so vinnig verbygevlieg, ek glo daar is ook van julle wat nie by alles uitgekom het soos beplan was vroeg in Januarie nie.

As terugblik het ons verskeie goeie oorde besoek, hoogtepunte ervaar, geseënde boodskappe uit die Woord ontvang, weereens 'n paar eerstes vir Rietvallei ervaar soos 'n suksesvolle uitreik projek; Carols by Candlelight; 'n Kaas en Wyn ete asook later vir die jaarafsluiting, die Mongolian Braai. Die SAWA Kongres te Hartenbos is ook goed bygewoon terwyl verskeie lede toere na die kongres meegemaak het. Maar die grootste is seker die Genade dat ons saamtrekke kon bywoon, net 'n bietjie kon afskakel van die gejaagde lewe, die saam kuier met vriende, die ontspan in die natuur en..... kampja!

Die 2013 kampprogram is so opgestel en goedgekeur om naweekkostes laag te hou deurdat tolhekke sover moontlik vermy wil word. 'n Paar nuwe oorde gaan besoek word en Rietvallei se 2de amptelike toer gaan onder leiding van Neels de Klerk en Margriet vd Berg plaasvind.

Aan ons nuwe lede, weereens welkom by die Rietvallei gesin.

Daar is te veel dankies om op te noem, die belangrikstes is gedurende die AJV en die Jaarafsluiting gedoen, maar aan ons Seniors, baie dankie vir jul aktiewe bydrae deur die jaar, en aan die Jeug, mag elke leerder sy eksamen met sukses slaag!

Hiermee wens ek, Marietjie en Marili 'n ieder en elke Rietvalleier, sy gesin en familie 'n Geseënde Christusfees toe.

Groete
Tjaart





'n Eenvoudige Kersfees

Op die oog af lyk die geboorte van Jesus in Bethlehem heel eenvoudig en alledaags. Dis 'n verhaal van 'n eenvoudige timmerman, Josef, en sy verloofde, Maria, wat net voor die geboorte van hul eersteling oppad is na die eenvoudige dorpie Bethlehem, om deur die Romeinse owerhede getel te word. Daar ontdek hulle dat elke herberg propvol is en moet hulle noodgedwonge 'n eenvoudige stal met gewone plaasdiere deel. Buite die dorp is daar wel 'n engelekoor om dinge so 'n bietjie status te gee, maar die besoekers wat deur God gekies word om getuies van die geboorte te wees, is eenvoudige herders wat in die veld bly, onder die sterrehemel slaap en skape oppas vir 'n lewe. G'n wonder dat baie mense vandag hul bes doen om Kersfees so 'n bietjie op te dollie nie. Met duur geskenke, blink liggies en 'n reuse Kersmaal probeer hulle meer luister aan die geleentheid verleen. Die eenvoudige Kersverhaal moet darem versier word met musiek en 'n Kersboom en 'n goedige Kersvader wat jou kous vul met alles wat jou hart begeer. En sodoende word ons maklik verlei om op die uiterlike te konsentreer en die eenvoud van Jesus se mens wording mis te kyk. Natuurlik moet en kan en mag ons maar Kersfees vier! Maar nooit mag ons, wat onself kinders van God noem, die ware betekenis van Kersfees vergeet en ophou om dit teenoor die wêreld uit te leef nie.

Inhoudsopgawe

- Voorsitterswoordskap
- Pitkos
- Redaksioneel
- Lief en Leed
- Kampnuus
- Toekennings
- Senior Burger hoekie
- Jeugnuus en -dinge
- Nuusbroggies
- Gemeenskapsprojek
- Wenke
- Haak die woonwa
- Knuppeldik
- Op ligte noot
- 2013 Kampprogram
- Adverteer



Rietvallei Bestuur 2012/13

Voorsitter

Tjaart Klaasen 082 785 6895
tjaartjk@absa.co.za

Ondervoorsitter

Hennie Engelbrecht 082 601 5914
henniee@netactive.co.za

Penningmeester

 **Lucille van den Berg 082 784 8528**
lucilleVa@Nedbank.co.za

Sekretaris

Marietjie Klaasen 072 423 6445
mmklaasen@gmail.com

Redakteur

Erna Koekemoer 082 324 3396
koekem@gmail.com

Kampkoördineerder

Hans Koekemoer 082 5657896
erhans@absamail.co.za

Jeugverteenwoordiger

Wayne Botha 083 607 0928
wayne@witklippies.co.za

Senior Burgerverteenwoordiger

Margriet van den Berg
082 586 0480
wavdberg@telkom.co.za

SAWA Webblad:

www.sawa.org.za

Redaksioneel

Soos die lente sy kop uitgesteek het en daarmee 'n nuwe seisoen inwy, voel 'n mens ook mos die borreling van lewe hier binne-in jou en 'n nuwe ywer pak jou beet. Ek weet ons vrouens wil graag was en skoonmaak en vensters wyd oopmaak om die lente en somer in te nooi – ek weet nie wat doen die mans nie – pak hul die motorhuis aan en maak skoon? So het ook 'n nuwigheid vir my aangebreek om vir Rietvallei te bedien en in te lig oor allerlei nuus en gebeure in ons streek. Ek nooi u uit om vir my bydraes te stuur – ons lede onderneem reise na alle plekke in ons land en reis deur interessante dorpe. Kom deel dit met ons, enige bydrae – wenke, humor, persoonlike ervarings en ook 'n resep of twee is welkom.

Met die kersseisoen wat voorlê wil ek aan elkeen 'n vreugdevolle Kerstdy toewens. Mag u werklik die vrede van Christus in u hart ervaar.

Erna



Lief ...

- Albert en Inge Gazendam het 'n seuntjie ryker geword. Baie geluk aan julle. Geluk ook aan Inge wat haar PhD graad verwerf het.
- Oom Pieter Reitz het gedurende die jaar verjaar en is nou 'n waardige 80 jaar oud.
- Ben en Alta van Eeden, Thinus en Tersia Fourie asook Chris en Nellie Stander se families het uitgebrei met die geboorte van hul kleinkinders.
- Hennie en Annemarie Engelbrecht se seun Arno is getroud. Baie geluk aan jul almal.

en leed

- Annatjie Maritz het 'n terugslag ondervind met haar gesondheid en ook 'n skoueroperasie ondergaan.
- Roekie Hill en Wilko Smit was in die hospitaal maar na behandeling weer ontslaan.
- Nellie Stander, Chris Stander, Alta van Eeden, Ettienne de Klerk asook Frits Crous, oom Willem Momberg en Alida Venter het gedurende die jaar operasies ondergaan. Ons is dankbaar dat almal goed herstel het.
- Oom Pieter Reitz het deur die jaar gesondheidsprobleme gehad en was weer in die hospitaal met onder andere nier- en lewerversaking. Hy het ook inwendige bloeding en Tannie Joan is ook gediagnoseer met gevorderde maagkanker. Beide se prognose is nie goed nie. Ons dra beide in ons gebede.

Die Geheim om gelukkig te wees!!!!

Eendag vra die een vriend vir die ander, 'hoe is dit moontlik dat jy altyd so gelukkig is? Jy het soveel energie, en ek het jou nog nooit af of moeg gesien nie..'

Met 'n glimlag in sy oë sê hy, 'Ek ken die geheim!' 'Wat se geheim is dit?' Hy antwoord: "ek sal jou alles van die geheim vertel, maar jy moet my belowe, dat jy die geheim met almal sal deel." Ek het geleer dat daar min is in my lewe wat ek kan doen om myself werklik gelukkig te maak. Ek moet op God vertrou om my gelukkig te maak en te voorsien in my behoeftes. Wanneer 'n behoefte in my lewe ontstaan, moet ek op God vertrou om dit te voorsien ooreenkomsdig sy besluit. Ek het geleer dat meeste van die tyd het ek nie die helfte nodig van dit wat ek wil hê nie. Hy het my nog nooit teleurgestel nie. Vandat ek hierdie geheim geleer het is ek gelukkig.'

Die vriend se eerste gedagte was. 'Dit is te simpel en eenvoudig! 'Maar nadat hy sy eie lewe oordink het besef hy, hy het gedink 'n groter huis sal hom gelukkiger maak maar nee, dit het nie! 'n Meer betalende werk sal hom gelukkig maak, maar dit het nie. Wanneer het hy besef was hy op sy gelukkigste? Toe hy saam met sy kinders op die mat gesit het, speletjies speel, pizza eet en vir hulle 'n storie gelees het. 'n Geskenk van God.

Weet dat God in sy wysheid altyd na jou sal omsien! Maar dit is nie 'n geheim nie ons moet net glo en vertrou God met ons hele hart.

Kampnuus

Uittreksels uit Kampe 2012

Jeugkamp Monateng Januarie 2012

Die doel van die kamp was om die jeug betrokke te kry by kampaktiwiteite sodat hulle weet dat hulle volwaardig deel van die streek is. Die kinders het gehelp om die 100+ boereworsrolle vir Vrydagaand se ete voor te berei. 'n Groot taak vir sulke klein skouertjies. Skriflesing en gebed tydens Vrydag en Saterdagaand se boekevat is deur die jeug behartig, en liedjies soos 'My God is so Groot' en 'Stapsoldaatjie' is deur groot en klein gesing. Die tradisionele Sondagoggend afsluitingstee is vervang met 'n waterlemoenfees. 'n Mens mag dalk wonder wat die resep vir so 'n naweek is. Dit is 'n baie eenvoudige resep met net een stap – 'Just add water'. Die modderplas voor ons woonwa was vroeg-vroeg die Vrydagaand al in 'n speelplek omskep.



Tydens Saterdag se waterspeletjies was jy droeër in die swembad as buite die swembad. Dr Rudie het seker gemaak die kinders het hulle tande geborsel, en sommer ook 'n toon met 'n doring in en 'n oor wat nie gebruik word nie afgesny. Kamp is nie kamp sonder die seniors wat

soos oudergewoonte voor die kamp optrek in hulle massas nie. Hulle nooi besoekers en asof dit nie genoeg is nie kry hulle ook sommer ander kampeerders in die oord om in te skakel by die naweek se aktiwiteite. 'n Puik voorbeeld vir ons jeug.



Liracia

24 – 26 Februarie

Van die begin af het ons almal welkom gevoel deurdat ons persoonlik welkom geheet is deur die eienaars van die oord. Dit is 'n uitsondering en maak van hierdie oord saam met al sy ander pluspunte beslis 'n jaarlike weersiens. Die oord is betreklik nuut, (slegs ±2 jaar in bedryf), maar dit doen geen afbreuk aan wat dit vir die woonwa-entoesias bied nie. Die ablusiegerewe is puik, en met sy (opsetlike) skewe spieëls sal daar geen verwarring wees as jy in die toekoms na die oord sou wou verwys nie. Met die uitsonderlike warm weer wat ons beleef het, moes ons dus "duck & dive" om die maksimum koeltetjies op te soek. Die swembad het darem 'n mate van lafenis gebied, (veral vir die jongspan). Vrydagaand is daar heerlik gesmul aan "Jaffles", wat keurig voorberei is deur Annatjie en haar span, naamlik Margriet, Marietjie, Anet, Alta en Sieg (wat net orders gegee en hanteer het). Annatjie se keurige "jaffles" is soos gewoonlik vinnig uitverkoop en 'n wins van R400.00 is oorbetaal aan Rietvallei se kas. Na boekvat het Sieg gesorg vir 'n heerlike bosveldvuur. Met Elsabé se lekkergoedblik vol soet verrassings wat kort-kort omgestuur is, is daar tot laatnag rondom Sieg se kampvuur gekuier.

Vroegoggend is Boekvat gehou en het ons die varsheid van 'n nuwe dag ervaar. Dankie aan ons kampkommandante vir die oulike idee. Verder het die Saterdag ewe rustig (en warm) verloop. Vroegmiddag het Sieg en die manne begin om vure aanmekaar te "kap" en so 'n vrolike gees geskep wat gesorg het vir 'n baie suksesvolle "saambraai" en "saamkuier" deur 'n ieder en elk. Benewens al die grappies onder mekaar en kwinkslae deur Sieg oor die "aanvalligheid" van vandag se vroulike jeug (wat nie in sy jongdae so vrylik beskikbaar was nie ☺), is daar lekker onderling gesels tot laat in die nag.

'n Sondag is nie 'n Sondag as daar nie koek-en-tee na die erediens is nie en weereens het almal heerlik saamgekuier en was die son die een wat elkeen na sy wa teruggestuur het.

Op hierdie positiewe noot sê ek dan groetnis tot ons mekaar weer ontmoet by Drie Berge.



Drie Berge Brits

Maart 2012

Weereens was hierdie 'n heerlike naweek by ons gewilde oord, Drie Berge Brits.

Dit het afgeskop met 'n paar lede wat reeds vanaf Woensdag kom uitspan en visgevang het, waarna die naweek op gebruiklike wyse begin is met 'n pragtige boekevat boodskap deur Oom Daan en Oom Mynhardt – baie dankie julle. Vier pragtige vure is aangestEEK om al die verskillende vleisdisse, mielies en selfs groentes gaan te braai. Marietjie het gesorg vir 'n smaklike brood- en konfyttafel wat vinnig-vinnig klaargemaak is. Daar is vroeg gaan slaap en ook selfs tot laataand gekuier.

Saterdagoggend is lui-lekker begin deur 'n paar kranige stappers wat die pad (of is dit nou die veld) gevat het en maar moegerig en honger eers hier by 10:00 terug was, reg vir 'n ontbyt....Wim het baie fluks gehelp om 'n lid se woonwa kragdraad reg te maak (so tussen ons die oom wou net kamp en het so ewe vergeet om die prop uit te trek).

Lede wat nie kon kom kamp nie, het ons kom verras en Saterdag kom kuier – baie dankie Jaco, Trix, Pieter, Magdaleen en kinders vir jul verrassing, ek dink die oumas was die meeste bly om die kleinkinders te kon sien. Saterdagaand is afgesluit met boekevat (gehanteer deur Tamara Kahts), rugby en stewige buurmanbraaie.

Sondagoggend se diens is oudergewoonte gehanteer deur ons eie Ds. Marnette waarna afsluiting en afkondigings gedoen is.

Kampbywoning - 20 waens, met 5 gaste.

Aansporingsplaatjies is uitgedeel aan Johann en Elsabe Grobler (Streek 180) asook Willem en Sonja de Jongh (Algemeen 25).



Die naweek is afgesluit met 'n pragtige gebed deur Hans en daarna 'n gesamentlike kermis-poedingtafel, nodeloos om te vermeld dat daar 2 tafels nodig was – baie dankie aan almal wat poedings geskenk het, die kas is versterk met R630.....



Gemeenskapsuitreik

Horison Sorgsentrum
'n plekkie in die son

Rietvallei het die tradisie om op Sondae 'n Erediens onder die bome te hou, en kerkkollektes wat hier opgeneem word, word al vir etlike jare aan Horison Sorgsentrum geskenk. Tydens die laaste oorhandiging op 01/11/2011, is daar behoeftes by die sentrum raakgesien. Rietvallei lede het dus hierdie gemeenskapsprojek aanvaar waartydens opknappingswerk aan die terrein van Horison Sorgsentrum gedoen is.

Die bestuur het dit goedgedink om hierdie hele projek tydens 'n plegtigheid by die Horison Sorgsentrum amptelik te oorhandig. Na heelwat beplanning en organisasie onder leiding van Tjaart Klaasen (voorsitter – foto onder links) het die groot dag aangebreek en Hans Koekemoer het die verwelkoming waargeneem. Tjaart het daarna die opening hanteer en daarop gewys dat die Erediens gehou word om sodoende ons dank te betuig en erkenning te gee aan ons Hemelse Vader; om vir SAWA lede te wys wat kan vermag word met saamstaan en samewerking en om die projek en verdere skenkings te oorhandig aan Horison Sorgsentrum.



Met die oorsig oor die geskiedenis en agtergrond van die projek agter die rug het Tjaart Ds Marnette van Rensburg (foto bo regs) bekendgestel en het sy die erediens op haar gebruiklike deernisvolle wyse hanteer.

Die res van die verloop van die program word aangevul met die oorhandiging van skenkings Rina van Heerden, Hoof van die Sorgsentrum (foto vlgde bl), het verduidelik wat die betekenis van die Houtkruis is wat in Maart 2007 onthul was en was daar ook geleentheid vir diegene wat om die Houtkruis wou stap. Rina het ook terugvoer gegee oor die Sorgsentrum. Tjaart het die bedankings waargeneem en Oom Neels De Klerk het die tafelgebed gedoen. 'n Ligte middagete en nagereg het die verrigtinge afgesluit.



Werk wat gedoen is tydens die projek is onder ander: Swaaihek verander na glyhek met 'n elektriese motor en reling, verf van hek, voorbereiding en opsit van elektriese heining, aanbring van veiligheidshek by ingang, oprig van staalhuisie en ander kleiner onderhoudswerk soos skoonmaak van geute, verseëeling van dak, ens. 'n Groot hoeveelheid skenkings is ontvang en laaste maar nie die minste nie is kos vir die werkers aangery of op die terrein voorberei.

Die projek is befonds deur lede wat ruim bygedra het en skenkings van lede se kontakte is bekom. R2 750 is deur 7 lede geskenk om die projek mee af te skop en hiervan is R677 oor en sal aangewend word om vir die kinders kleurkryte en verf te koop. Die res van die projek was suiwer skenkings van lede en instansies.



Wenke!

Vir goeie fotos

Dra jou kamera altyd by jou – daardie wenfoto is al so verloor.

Kyk rond, konsentreer op soek na daardie unieke foto.

Neem 'n 'middagslapie' – in die algemeen is die middag die slegste tyd vir fotos, neem vroeg in dieoggend en net voor die son sak.

Moenie vergeet om te geniet waar jy is nie. Ruik die lug, luister musiek, praat met mense. Dit verg baie aandag om daardie spesiale, unieke foto te kry.

Beweeg! Moenie net 'n foto neem vanaf die eerste plek wat jy iets sien nie.

Stap nader, verder weg, buk af, staan op iets. Moenie staatmaak op jou kamera se zoom nie, dit maak jou net lui.

Wees geduldig.

Gaan waar die ander vakansiegangers nie is nie, skep so daardie 'unieke' foto en ander mense sal ook 'oop' wees vir jou fotografie.

Lekker kliek!!



Haak die wa...

SAWA herinner ons aan die volgende padgebruik:

Die skouer van die pad -

Gebruik die skouer net in omstandighede wanneer dit absoluut nodig is en wanneer die sig na voor voldoende is om enige moontlike gevaar betyds raak te sien. Die wetlike bepalings moet nagekom word.

Indien daar in die nag gery moet word, moet die skouer vermy word.

Op paaie waar daar slegs 'n enkelbaan is, kan daar in die skouer gery word om sodoende voertuie die geleentheid te gee om verby te beweeg, maar ook net slegs wanneer dit 100% veilig is.

Waak daarteen om in die skouer te ver na links te beweeg, want dit kan moontlik die woonwa se band beskadig as dit die teeroppervlakte verlaat.

By 'n ongelukstoneel-

Moet nie stilhou op 'n deurpad nie. Dit kan 'n verdere ongeluksrisiko skep.

Wanneer daar geen hulp by 'n ongeluk is nie, moet 'n veilige plek gesoek word om af te trek.

Knuppeldik

Beesstert vir die prutpot (of potjie)

Hoeveel van alles

4 medium uie gekap
1 beesstert in stukke
4 eetlepels olyfolie
1 teelepel sout
1 teelepel peper
1 teelepel paprika
125ml Coke
125ml rooi wyn
2 biefekstrakblokkies
1 pakkie bruin uiesoppoeier
1 liter water

So gemaak

Verhit die olie in 'n pot oor matige tot warm hitte, voeg uie by en braai tot verkleur. Voeg die beesstertstukke by, slegs 'n paar op 'n keer, en braai tot bruin. Voeg die sout, peper en paprika saam met oorblywende beesstert by en braai nog 'n paar minute. Voeg nou die coke en wyn by en prut vir 5 minute. Voeg nou die gekrummelde ekstrakblokkie, bruin uiesoppoeier en $\frac{1}{2}$ l water by, plaas deksel op en prut 10 to 12 ure. Na 4-5 uur toets die vloeistofvlak en voeg nog water by indien nodig.

Bedien met rys, stampmielies of pap.



Lekkerste "Punch"

1 bottel Passion Fruit aanmaakoeldrank
1 blik fyngemaakte pynappelstukkies (410g)
1 blikkie grenadella moes (100g)
1 liter Sprite
1 liter sodawater
Baie ys

Meng alles in bolabak ('n 5 l waterbottel werk ook goed)

Vir die wat die skaal dophou, gebruik Sprite Zero en Weight Watchers se Passion Fruit.

Op ligte noot

SENIOR DRIVING

Two elderly women were out driving in a large car - both could barely see over the dashboard. As they were cruising along, they came to major crossroad. The stop light was red, but they just went on through.

The woman in the passenger seat thought to herself, "I must be losing it. I could have sworn we just went through a red light."

After a few more minutes, they came to another major junction and the light was red again. Again, they went right through. The woman in the passenger seat was almost sure that the light had been red, but was really concerned that she was losing it. She was getting nervous.

At the next junction, sure enough, the light was red and they went on through.

So, she turned to the other woman and said, "Mildred, did you know that we just ran through three red lights in a row? You could have killed us both!"

Mildred turned to her and said, "Oh! Am I driving?"



As a senior citizen was driving down the highway, his car phone rang.

Answering, he heard his wife's voice urgently warning him, "Vernon , I just heard on the news that there's a car going the wrong way on I-25. Please be careful!"

"Hell," said Vernon, "It's not just one car... It's hundreds of them!"

On my recent visit to England and the Olympics I saw a car with a bumper sticker **"EK MIS Suid Afrika"...**

so I broke his window, stole his radio and laptop and left a note which said: **"Voel jy nou beter?"**

Kampprogram 2013

S.A.W.A. Streek Rietvallei

JAARPROGRAM vir 2013



DATUM 2013	OORD	TIPE KAMP	KAMP KOMMANDANTE
16 – 18 Jan	Mopani (Pta)	Snr Burger Saamtrek	Seniors
18 – 19 Jan	Mopani (Pta)	Streekskamp & Jeugkamp	Wayne en Lucille
15 – 16 Feb	Monateng (Pta)	Streekskamp	Hans en Hennie
08 – 09 Mrt	Bosfontein (Bela-Bela)	Streekskamp	Fanie en Jake
29 – 31 Mrt 01 – 01 Apr	Klipdraai	Presidente	NUB
19 – 20 Apr	Bosveld Oase (Brits)	Streekskamp	Tjaart en Marietjie
10 April-10 Mei	Kruine Toer	Streeksstoer	Seniors
17 – 18 Mei	Drie Berge	Streekskamp	Ben en Tinus
24 – 25 Mei	Dube	Kuiersaamtrek	Bosveld
31 Mei	Sal aangekondig word	Sitrusfees	Roodekruin
07 – 08 Jun		Voorsittersuitnodiging	NVT
14 – 17 Jun	Weesgerus ????	Wintersaamtrek	NUB
21 – 26 Jul	Manyane	Kuiersaamtrek	Bosveld
06 – 07 Aug	Tamboti	Snr Burger Saamtrek	Seniors
08 – 10 Aug	Tamboti (Pta)	Streekskamp (AJV) asook Snr Burger Naweek	Bestuur
13 – 14 Sep	Shangrila Innies Bos (Brits)	Streekskamp	Willem en Sonja
13 – 14 Sep	Koppisol	Nasionale Saamtrek	NUB
11 – 12 Okt	ATKV Buffelspoort	Kongres	NUB
18 – 19 Okt	Klein Paradys (Brits)	Streekskamp	Corne en Renier
08 – 09 Nov	Hartbeeshoek (Brits)	Streekskamp, Jeugkamp & Jaarafsluiting	Bestuur

NB. Kampe wat in blou gemerk is, is Streekskampe en tel vir 100% bywoning.

Adverteer

RT INSTALLATION AND MAINTENANCE

www.rtinstallation.co.za Tel: +27 12 997 4722, Fax: +27 86 6499 588, Cell: +27 82-601-5914
(Hennie)

- ❖ Digital CCTV Monitoring System
- ❖ Photo ID System
- ❖ Biometrics Recognition System
- ❖ Access Control System
- ❖ Time and Attendance Monitoring Systems
- ❖ Guard Monitoring System
- ❖ Boom gates, Anti-Bandits door, turnstiles and etc.
- ❖ Parking Systems
- ❖ Electric Fencing
- ❖ Gate Motors
- ❖ Intercoms



Foil Forever

Verskaffers van die nuwe generasie

ALUMINIUM SEILE / AWNINGS



Tel: 083 654 6549

Email: foil@tinel.co.za

Hou ons web bladsy dop vir ons nuwe produkte

www.tinel.co.za

Rietvallei toekennings

Ons is met reg trots op ons lede wat toekennings ontvang het gedurende die AJV. Die Rietvalleier van die Jaar toekenning is aan Daan van der Berg (links onder) gemaak. Daan is een na wie ons kan opkyk as 'n gesinsleier, sy bereidwilligheid om orals uit te help, sy dienswilligheid, diensbaarheid en behulpsaamheid maak van hom 'n waardige ontvanger van die Trofee. Rietvallei is nie minder trots op Margriet van den Berg nie. Haar onskatbare waarde, bydrae en bystand tot SAWA die afgelope 2 jaar as Senior Burgerverteenwoordiger is raakgesien. Die seniors se sake is haar prioriteit en sy skroom nie om vir hul informele funksies te reël en te hou nie. Haar kennis van SAWA deel sy graag en verder is Margriet altyd gewillig om met enige versoek, streekbestuur te ondersteun en by te staan.



Streek Meriete

Links bo na regs onder: Marnette van Rensburg ontvang die toekenning vir die waarneem van eredienste, die kanselkleed afhandeling en die aanbieding van Rietvallei se 1ste Nagmaal, Hans Koekemoer vir sy bydrae tot die woonwabedryf, reël vir borge vir funksies, bedinging vir afslag en gratis naweke by oorde en vir die woonwapraatjies waar hy SAWA en ons streek bekendgestel het, Pieter Viljoen vir die reël van 'n borgskap tydens die 2012 Presidente, wat bygedra het tot Rietvallei se suksesvolle bydrae tot die Nasionale kas. Ook vir sy hulp met funksies en verskaffing van toerusting, Elsabe Grobler as erkenning vir haar bydrae as Nuusbriedfredakteur. Elsabe het in haar termyn die Rietstok en webbladbydraes uitgebou tot 'n groot sukses en daarmee 'n paar toekennings ingegees.



Kleilat hoekie

'n Eerste vir Rietvallei:



Rietvalleiertjie van die Jaar 2012

Denise Botha ontvang haar trofee vir haar bydrae tot die sukses van die kaskarwedren tydens die 2012 Presidente. Die toekenning is sedert 2012 uitgedeel aan jeuglede wat spesifiek uitgestaan het deur die loop van die jaar. Hierdie is 'n trofee-erkennung anders as die standaard meriete toekennings. Sy is ook aangewys as die Jeugleier van ons jongspan, onder die vlerk van ons Jeugverteenvoordiger. Die besondere trofee is geskenk deur Jaco en Trix van den Berg.



Ja, een van die dae is dit weer vakansietyd en baie van die maats gaan see toe of plaas toe. Dalk is daar van die maats wat by die huis gaan bly maar die nefies en higgies kom dalk kuier.

Hier is vir julle 'n paar dinge om te doen om julle besig te hou – onthou net mamma, pappa of ouer boetie of sussie moet julle help.

Lekker vakansie hou!



Gesigverf

Bestanddele:

1 bottel goedkoop "aqueous" room poeierverf



Metode:

1. Verdeel die room in kleiner houers.
2. Meng die verlangde kleure verf met die room.

Die verf was maklik af en beskadig glad nie die kinders se velletjies nie.

Ongekookte sagte soutklei

Bestanddele:

2 koppies koekmeel of broodmeel
1/2 koppie sout
1 eetlepel sonneblomolie
1/2 koppie water
koekkleursel

Kitslekkers

Bestanddele:

1 pakkie Mariebeskuitjies
1 blikkie kondensmelk
'n pakkie klapper
'n bietjie meel



Metode:

1. Rol die beskuitjies fyn met 'n koekroller/bottel.
2. Gooi die kondensmelk uit in 'n groterige houer.
3. Roer die fyn beskuitjies in die kondensmelk in.
4. Vorm balletjies en rol die balletjies in die klapper.

Metode:

1. Meng die water en sonneblomolie.
2. Roer die meel en sout in.
3. Knie tot brooddeeg.
4. Indien nodig, voeg nog water by.
5. Voeg die koekkleursel by.
6. Knie tot die kleur deeglik ingemeng is. Bere in 'n plastieksakkie of plastiek-bakkie om die klei sag te hou.



Kleur die prentjie in en gee dit dan as Kerspresentjie aan 'n maatjie en vertel die storie van die prentjie



Nuusbrokkies

- ❖ Rietvallei het nou sy eie “Groep” op Faceboek waaraan almal wat wil kan aansluit. Die “Groep” is oop vir alle Rietvallei Lede. Die doel van die “Facebook Groep” is nie om enige van die huidige kommunikasiemetodes te vervang nie. Dit is net ‘n sosiale bladsy van en vir Rietvallei wat deur enige lid wat toegang tot internetdiens het, na toe kan gaan en sien wat die ander lede/streek aanvang.
- ❖ Die nuwe kampdrag, ‘n blou gholfhemp en knopiehemp en ‘n keuse van warm baadjies (met Rietvallei logo geborduur), is bekendgestel en bestellings vir 2012 is afgehandel. Bestellings kan weer van vroeg volgende jaar geplaas word.
- ❖ Rietvallei het ‘n gemeenskapsprojek by Horison Sorgsentrum onderneem en die projek tydens ‘n oorhandigingsfunksie amptelik oorhandig. Dit was goed ondersteun deur Rietvallei lede, inwoners van die sentrum asook hulle ouers.
- ❖ Klereskenkings deur lede die afgelope paar maande is ook weer aan Solidariteit se Helpende Hand oorhandig.
- ❖ Die Seniors se Kruine Toer sal plaasvind vanaf 10 April tot 10 Mei 2013.
- ❖ Die volgende lede se bedankings is ontvang: Frits en Tanya Kroon; Oom Willem en Tannie Martie Momberg, Jos en Christine Groenewald asook Willem en Magdaleen Grobler.
- ❖ Enigeen wat belangstel om ‘n advertensie en/of artikels of enige nuuswaardigheid in die nuusbrief te plaas kan dit met die nuusbriefredaktrise reël. ‘n Tarief van R200 per jaar word gehef vir ‘n minimum van 4 advertensieplasings.
- ❖ **Gebied:** Die gebiedsbestuur van Jakaranda het by sy onlangse vergadering die volgende ampsdraers aangewys: Voorsitter: Martin Rix; Ondervoorsitter: Roelf Strydom; Sekretaris-Redakteur: Johann Lemmer; Penningmeester: Mel Ueckermann; Senior Burgerverteenvoordiger: Johanna van Biljon.

AJV 2012 – Tamboti Vreugde



Sawa Rietvallei Gesinsnaweek

So vinnig het 'n jaar verbygegaan en was dit weer tyd vir SAWA streke om tydens die jaarvergadering te besin oor sake wat hulle streek raak. Danksy die heerlike publieke vakansiedag het Rietvalleiers al vanaf Donderdag by Tamboti Vreugde aangekom. Vrydag is ook sommer so ekstra ingegooi om dit 'n heerlike langnaweek te maak. Teen Vrydagaand het die gesinne wat nog Vrydag moes werk aangesluit en is daar heerlik om die vure gekuier. Elkeen het gesorg vir sy eie ete maar die drinkgoed (en komberse) is so oor en weer gedeel. Na 'n laataand boekvat het dit gou-gou stil geword want die koue het oral in die ledemate ingekruip.

Saterdagoggend het helder en sonnig en heerlik warm aangebreek en van vroeg af al is gewerskaf om die vergaderplek in te rig. Teen 10 uur het oom Neels en Tannie Rina op hul gebruiklike rustige en mooi manier die vergadering geopen met skriflesing en gebed.

Die Botha-gesin het 'n pragtige voorstelling gedoen wat, ek glo, elkeen diep geraak het. Denise Botha het 'n besondere toekenning, Rietvalleiertjie van die Jaar ('n eerste vir

Rietvallei), ontvang vir haar bydrae by die Presidente saamtrek. Tydens die vergadering is 'n aantal hoogtepunte uitgelig, mylpale wat bereik is gemeld en dan ook soos gebruiklik 'n paar welverdiende toekennings aan lede gemaak. Na die vergadering is daar heerlik gekuier om die tafels met kaas en wyn. Marietjie en jou helpers – dit was 'n groot sukses, baie dankie.

Vir die res van die middag is daar lekker gekuier. Sommiges het 'n welverdiende ruskansie geneem. Te gou het die koue ons bekruip en is die vure aangestEEK om sommer al vroeg die ete gereed te kry. Sondag het almal maar koulik bymekaargekom vir die gebruiklike erediens terwyl die jongspan ook by hulle DisCo betrokke was. Ons harte is gou verwarm met heerlike samesang en 'n besielende boodskap deur Jacques.

Die naweek is afgesluit deur Tjaart en sommer gou het die kamp leeggeloop. Die einde van die langnaweek het meegebring dat almal maar skrikkerig was vir die besige paaie en het maar vroeg huiswaarts gekeer.

Kongres 2012

'n Aantal Rietvalleiers, 16 van ons lede, was bevoorreg om die Kongres in die mooie Hartenbos by te woon. Sommige lede het op eie stoom daar aangekom terwyl ander deel was van SAWA toere en of eie toere. Hulle was Chris en Ansie Delport, Ben en Alta van Eeden, Henry en Roekie Hill, Tinus en Tertia Fourie, Neels en Rina de Klerk, Wim en Margriet vd Berg, Ann Steward, Diana Fourie, Tjaart en Marietjie Klaasen.



Saterdagoggend het die kongres afgeskop op die tradisionele geordende wyse, maar eers was daar hulde gebring aan Fanie Jordaan (Nasionale Penningmeester) wat oorlede is. Enkele punte in Jurie Dreyer se voorsittersverslag was die volgende:

Ledetal en uitbreiding: Hoë brandstofprys, tolgelde, koste vir die onderhoud van voertuie en woonwaens en stygende koste by oorde is faktore wat bydra dat SAWA se ledetal onder druk is maar die mening is dat al sou al bogemelde faktore buite rekening gelaat word sekere streke nog steeds 'n probleem met ledewerwing sal ondervind as gevolg van onbetrokkenheid. Op 30 Junie 2011 was die ledetal 1678 en op 30 Junie 2012 was dit 1556 - dus 'n daling van 7,27%.

Ledegeld word vanaf 1 Desember 2012 van R260 verhoog met R30. Die afslag van R10 vir debietorders en R10 vir senior burgers asook aansluitingsfooi van R150 vir nuwe lede bly in plek.

Hierdie jaar het SAWA 3 prys uitgeloot deur middel van kaartjies wat tydens ons kampe te koop was. Ons eie Jak Wagenaar was die gelukkige wenner van die 3de prys ('n MP4 speler) - baie geluk Jak!

Om die Kongres mee af te sluit, is daar Sondag na die Erediens met Spur onderhandel en het ongeveer 60 mense die "R19.95 Special Breakfast" gaan eet, terwyl hul die mooiste uitsig oor Hartenbos se strand gehad het.

'n Woord van dank van Tjaart aan ieder en elk wat bygedra het tot die Kongres asook die Rietvalleiers wat dit kon bywoon.

Kaya Manzi

September 2012

Die kamp het plaasgevind gedurende die naweek van 7-9 September. Voor die naweek het ons 'n nat en koue front beleef. Dit het katte en honde gereën en ek het voorsien dat ons net 'n paar Rietvalleiers gaan wees wat die ongure weer sou kom trotseer.



Maar later die middag het die reën bedaar en het die Rietvalleiers een na die ander opgedaan. Toe besef ek weer dat ons streek nie skrik vir 'n bietjie reën en koue nie. Ons was 10 woonwaens en nie veel kindertjies nie, maar dit was 'n heerlike naweek.

Die hoogtepunt was toe 'n hele paar entoesiaste die nat 4x4 roete aangepak en laatmiddag met vuil voertuie en breë glimlagte teruggekeer het. Sommige se lywe was seer van die uitklim en "stap die hindernis" maar almal was dit eens – hul voertuig kon!!

Sondagoggend is daar onder die groot boom stil geword met die Woord, lekker gesing waarna ons na 'n wonderlike getuienis geluister het, gelewer deur Glenn Kahts. Daarna was dit die gebruikelike afkondigings waartydens enkele toekennings oorhandig is en koek en tee se beurt wat, nodeloos om te sê, goed afgehandel is.

Dit was 'n naweek met min aktiwiteite, maar propvol van heerlike kuier en rus.



MOPANI

OKTOBER 2012

Ons gaan wegspoel die naweek!” “Ja, ek hoop maar ons kan die afdak gebruik vir die Vrydagaand se ete. Vir die res moet ons maar in ons woonwaens sit en muf.”

.. wel, dis hoe ons gedink het, want volgens die weerprofete sou dit 'n besonder nat naweek gewees het. En dit was! Met groot haelskade ook nog. Maar op ander plekke – nie by Mopani nie. Ons kon dus heerlik saamkuier Vrydagaand rondom Elsabe se papert en “swiets-emmer”. (Sy het haarself oortref! Ons ken almal haar koekblik met soetgoed, maar 'n emmer!!). Marnette se heerlike slaai was 'n paar besoeke by die tafel werd. Reinier en Lucille het ook van die geleentheid gebruik gemaak om die nuwe hemde en baadjies vir ons streek te vertoon (met positiewe reaksie). Oom Mynhardt het 'n paar gedagtes met ons gedeel wat almal laat skaterlag het maar ook bewus gemaak het van die 'broosheid' van die ouderdom.



Saterdag was daar sommer 'n paar verjaardagvieringe: klein Lourens Gazendam se verjaardag het vir 'n heerlike kinderpartyjie gesorg; een van ons gaste, Dirk Venter (Chris en Nellie se skoonseun) het so stil-stil daar by die karavaan verjaar en die aand is ons bederf met heerlike bykosse en nagereg as gevolg van Corne se verjaardag viering. Skale het seker maar gekreun Maandag (of is selfs heeltemal vermy). Sondagoggend het Marnette ouergewoonte die

Reinier en Lucille (links) met die nuwe kampdrag en regs geniet Klaus hom gate uit!!

preekstoel nadergeskuif, omdat almal altyd so ver moontlik van haar af gaan sit. Wayne het spesiaal gekom om die DisCo vir die jeug aan te bied, en daarna kon ons heerlik onder die bome kuier met nog lekkernye. (Dis bietjie soos daardie bankadvertensie waar Werner se kollega sê: “more daughters?!” Ons kan met reg sê: “more foodstuffs/more cakes?!”).

Dit was nie maklik om op te pak om huis toe te gaan met nog 'n week van dolle gejaag wat voorlê nie.



HARTBEESHOEK SENIOR KAMP: 7 - 8 NOV 2012

KLEIN PARADYS SENIOR BURGER NAWEEK EN JAARAFSLUITING: 9 – 10 NOV 2012

"Hoekom wag tot Woensdag? Kom ons gaan kamp al Maandag!"

Dit is wat van Rietvallei se seniors (een amper senior) toe gedoen het. Ons is almal baie vriendelik ontvang en gou gehelp om reg te staan deur die oordbestuur. Ons was bevoorreg om ook saam met Margriet se gaste te kon kamp, baie dankie Fanie en Elsette dat jul deel was van al ons aktiwiteit, ons wag nou vir daardie aansoekvorm. Dinsdag het nog twee lede by ons aangesluit en toe het die kuier in alle erns begin. Daar is heerlik gestap, vroeg in dieoggend, 'n vinniger stap vir die wat oefening wou hê en ook 'n stadige gesels-stap vir die wat net die natuur wou geniet!

Vrydagoggend is daar traag opgeslaan maar toe die opwinding ons vang, trek die konvooi weg en binne 17 minute is ons by ons volgende kamp, want sien, die senior burger week is nog nie klaar nie, ons sluit nou aan by die res van die streek vir die bederf senior naweek en die jaarafsluiting. Ja, die Ingelse praat van "the early bird catches the worm", maar die vroeë Rietvalleiers kry toe darem koeltebome, so het Tjaart en Marietjie, Willem en Sonja, Reinier asook Corne agterkom toe hul al teen 08:00 klaar kamp opgeslaan het.....die Seniors het eers net na 09:00 daar aangekom, nou nie eerste nie, maar darem 'n "ou boompie" gekry, moes ek brom-brom hoor!!

Vrydagaand se feestelikhede het vetkoeke en maalvleis ingesluit. Aangesien dit die seniors se naweek was, is die vetkoeke en maalvleis gratis verskaf vir almal bo 60 (jaar en nie kilogram nie, soos sommige slimmes wou aanvoer). Rudie en Mia het die reëlings vir Vrydag en Saterdag op hul geneem terwyl die bestuur hul bygestaan het, en die mini kermis was 'n reuse sukses.



Daar was natuurlik die seniors se harde werk met heerlike pannekoek, net genoeg om as ontbyt te dien. Daarna was daar 'n poedingtafel, met jellie en vla ook, beskikbaar asook stokkiesroomyse en "chips", met trots deur ons jeug verkoop. Daar was genoeg "cupcakes" om 'n "army" mee te voer, maar kon nie geëet word nie, dit moet eers versier geword het, met groot konsentrasie van pa's en kinders. Die een was so "mooi" versier dat dit telkens teruggeskenk was vir opveiling, maar o wee, die nuwe koper het hom dadelik teruggegee...¹⁵

Die middag is daar rustig langs die dam gestap, geslaap, gesels, in afwagting vir die Carols by Candlelight, aangebied deur die jeug waar hul die geboorte van Christus uitgebeeld het met voordrag, konsert hou asook lieflike samesang. Die lede het in 'n hoefystervorm gesit en almal het 'n kers vasgehou. Nog 'n eerste vir Rietvallei, maar definitief 'n reuse sukses. Tjaart het Oom Willem en Tannie Marthie Momberg genooi as eregaste (sonder dat hul weet het hul ingestem) en so besoek hul ons dus Sondagoggend en woon die res van die dag, as eregaste, ons verrigtinge by.



Marnette lever ons 2de nagmaal- diens waarna ons die afkondigings afhandel. Aangesien dit ons senior burger naweek was, het Tjaart heelwat aktiwiteite daar rondom gehanteer. Maar die hele afsluiting is opgedra aan Oom Willem en Tannie Marthie, as oudste Rietvallei lid (in ouderdom jare) asook om op 'n gepaste wyse afskeid te neem aangesien hul nou die wa verkoop het en nie meer sal kan kamp nie.

Die kamp is goed bygewoon met 20 lede, 2 gaste en 15 kinders teenwoordig. Oorhandigings tydens die afsluiting was aan:

- Jak Wagenaar (Streekmeriete – wat vanaf AJV oorgedra is – vir sy positiewe bydrae tot Rietvallei Streek)
- Ben Van Eeden van A-Z Chemicals ('n Sertifikaat van verdienste vir bydrae tot Horison Sorg Sentrum)
- Pieter Viljoen ('n Sertifikaat van verdienste vir Amanzingwe se skenking van 'n wegbrekknwEEK, wat tydens die Presidente uitgeloot is) aangesien hy soms kom kamp sonder kontant en dan moet terugry na die naaste dorp om geld te trek, asook om vir elke lootjie 'n trekking te koop (wat nogal later "afbetaal" is).
- Tinus en Tersia Fourie (10 Streek Aansporingsplaatjie)
- Rudie en Mia Crous, Tjaart en Marietjie Klaasen, Reiner en Lucille van den Berg, Wim en Margriet van den Berg en Wayne en Annemarie Botha (Kampkommandante plaatjies)

Oom Neels het 'n paar gevleuelde woorde gespreek en namens Rietvallei ons wense oorgedra aan Oom Willem en Tannie Marthie, waarna hy die naweek afgesluit het met seëngebed asook tafelgebed met die Sondagete wat gevolg het. Die tafels was reeds staangemaak, gedek en kreun onder die kosse (aangesien Saterdag so baie etery ingehou het, is daar besluit om anders te wees en die afsluitingsfunksie / ete Sondag te hou). Marietjie Klaasen en 'n paar helpende hande het die kosse voorgesit en elkeen het homself gehelp en sy eie Mongolian Braai bymekaar gemaak en gebraai met die nodige soetgoed daarna. Nodeloos om te sê, so is daar maar traag opgepak en amper niemand het voor 14:00 die oord verlaat nie, wat 'n week en naweek!

Senior Burgerhoekie

Wat maak jy vandag?...

...niks...



...dis mos wat jy gister
gedoen het?...

...het nie klaar gekry nie...




...en op bogenoemde trant geniet Rietvallei se Senior burgers hul aftreejare. Want van een saamkuier na die ander en een toer na 'n volgende toer kan hulle nie klaarkry met die lekker nie. Margriet het die volgende te sê gehad oor die nie-amptelike kongrestoer:

50 DAE KAAPTOER DEUR TRANSKEI NA KONGRES EN BAIE MEER.....

Ons, dis nou ek (Margriet) en Wim, Oom Neels en Tannie Rina, Sieg en Annatjie en Ann, vertrek op 6 September 2012 om 05:00 in die reën. Eerste oornagplek is Himeville, maar ons loop 'n bloutjie na 10km se erge modderpad waar ons uiteindelik moes terugdraai en op Underberg oornag (Neels het eers goed vasgesit in die modder met die woonwa aan en deur 'n trekker uitgesleep). Dit was 'n dag van erge reën en 14 ure op die pad. Volgende dag ry sommige van ons Sani Pas, party tot waar sneeu mooi sigbaar is en ander tot in die sneeu. Wat 'n ervaring! Nou na Port st. Johns deur Kokstad en Flagstaff - wat 'n belewenis! Dis net mense, taxis, vragmotors en diere in een groot warboel. Dit is 'n kuns om met woonwaens daardeur te kom sonder om iets of iemand te raak. Ons kamp by 'Die Pont' woonwapark, op die wal van die rivier oorkant Pondobrug. Ons gaan bekyk al die kleurvolle huisies, hoog teen die berge op, besoek Poenskop, vanwaar ons 'n baie mooi uitsig oor die omgewing se natuurskoon het.

Volgende bestemming is Koffiebaai. Gaan kyk na "Hole in the wall" - pragtig. Baie groot ontwikkeling daar, alhoewel die paaie nie veel aangedoen is nie. Staan ook by Morgan Bay, lekker teen die see. Ongelukkig reën dit vir 'n paar dae en waai 'n sterk wind. Daarna kamp ons by Green Fountain (vyfster kamp), 10 km vanaf Port Alfred. Die dorp het my heeltemal verbaas. Pragtige plek met 'n paar seestrate, pragtige huise, baie winkels en alles wat nodig is. Besoek "Big Pineapple" in Bathurst, waar jy alles kan leer van verbouing van pynappels en enige produk daarvan kan koop. Vandaar ry ons deur die Langkloof, met sy eie bekoring, na Joubertina waar ons by "Die Kraaltjie" oornag, letterlik tussen die skape.



Van hier gaan ons na die kongres. Verder deur die Langkloof, met al die peer-, perske- en appelboorde deur Krakeelrivier, Louterwater, Misgund en Avontuur (die interessantste name) na George en toe Hartenbos. Ons word vriendelik ontvang en geniet die gesels met al die ou bekendes. Geniet 'n uitsonderlike ete by "De Vette Mossel" by Klein Brakrivier en woon die volgende dag die kongres by, waar alles goed verloop en sluit ons verblyf in Hartenbos af met 'n heerlike dinne (daar was 16 Rietvalleiers).

Ons staan by Jongensfontein met lekker staproete langs die see, en toe Witsand waar ons die duine op die strand aandurf. Sien ook baie walvisse daar. Ry vandaar na Malagas, waar ons met die enigste handgedrewe pont wat nog in werking is, oor die Breederivier gaan, daar bietjie rondkyk en weer terug. Nou gaan ons bietjie binneland in na Montagu deur die Tredoux's Pas met die mooiste uitsigte. Ons ry na "Protea Farm" in Burger's Pas vanwaar ons met die trekker



teen die berg opty tot 'n hoogte van 1500meter. Wat 'n belewenis!! BAIE koud bo op die berg, maar die uitsig is onbeskryflik en 'n glasie sjerrie maak ons gou weer warm. Onder gekom staan die potjies (waterblommetjiebredie, kerrieskaappot en 'n hoenderpot) gereed om bedien te word. Daarna word heerlike nagereg bedien. Dit is voorwaar aan te beveel. Kan natuurlik nie van Montagu af weggaan sonder droë vrugte en heerlike muskadel nie.

Terug na die kus gaan staan ons by Struisbaai waar ons heerlik snoek braai by Neels en Rina se kinders. Ons besoek Waenhuiskrans om na die grot te gaan kyk (moet laagwater wees), ook Kaap Agulhas, mees suidelike punt van Afrika, die wind waai egter so sterk dat dit nie aangenaam was om op die vuurtoring te klim nie. Die skeepswrakmuseum in Bredasdorp is die moeite wert om te sien. Terwyl Neels en Rina nog kuier, vertrek die ander na Onrusrivier by Hermanus waar ons lekker gaan stap het in die Ferndale Natuurreservaat. Die verlore skape sluit weer by ons aan voordat ons na Van Zylsrus naby Kuilsrivier gaan. Ons ry die lieflike roete langs die kus. Besoek Vlinderplaas, baie interessant, en gaan kuier bietjie by Melkbosstrand. Probeer elke dag om Tafelberg op te gaan, maar die wind bly te sterk. Ry via Muizenberg, Simonstad, Chapman's Peak pad na Houtbaai. Wat 'n fantastiese mooi roete. Terug via Lundudno, Kampsbaai, Clifton en Groenpunt, wonderlike dag gewees. Volgende dag gaan ons vroeg na Tafelberg en wag in die hoop dat ons sal kan opgaan. Baie gelukkig toe die kabelspoor om 11:00 oopmaak en ons werklik kon opgaan. Nog 'n wonderlike ondervinding met die nuwe kabelspoor wat in die rondte draai. Die uitsig was fantasmagories (soos Paula sal sê).



Tredouxpas druip grot



Stadsaal grotte in die Sederberge

Hiervandaan gaan ons na Ceres. Ons ry Gydo pas na Op die Berg, verby Alfred Hamlet na Katbakkiespas en draai af na Kagga Kamma - 'n besondere lodge tussen die rotse. Kamers is in die rotse gebou, baie besonders - 'n moet om te sien. Besigtig Tulbach en ry Bain's pas na Wellington. Volgende oornagplek is Markuskraal tussen Citrusdal en Clanwilliam. Baie mooi op 'n lemoenplaas. Ry by Citrusdal die Middelbergpas, klim 850 meter en daal dan weer tot by Buffelsfontein, om na al die proteas te kyk. Volgende dag doen ons pakhuispas by Clanwilliam, Berg se hoek pas na Biedouwvallei en dan na Wupperthal. Daarvandaan teen die berg op na Eselsbank, ry bo-op Sederberge na Matjiesrivier en Dwarsrivier na Stadsaalgrotte. Nog 'n wonderlike ervaring. Dit bestaan uit verweerde rotsformasies - nog nooit so iets gesien nie!

Op pad na Piketberg ry ons die Versfeldpas na Bo-berg-Piket, baie skerp haarnaalddraaie met onbeskrylike uitsigte. Gaan kyk na besondere kerk in Piketberg waar hulle 'n klein kerkie se preekstoel behou en 'n nuwe groot kerk rondom die preekstoel bou. Verskuif na Vanrhynsdorp, ry Gifbergpas (niemand kan sê waar die naam vandaan kom nie). Ons laaste bestemming is Springbok via Nuwerus, Bitterfontein tot by Garies en Kamieskroon. Volgende dag besoek ons Leliefontein, waar ons bietjie met die plaaslike mense gesels, via Kammiespas, Doringkloofpas en Studelpas terug. Dit is verbasend met hoe min mense tevreden is en nog gelukkig is daarby.

Vanaf Springbok gaan ons na Douglas om bietjie by ons kinders te kuier en die ander gaan via Upington en Vryburg na Pretoria. Ons arriveer almal op Vrydag 26 Oktober weer terug in Pretoria.

Een van die lekkerste toere wat ons nog meegemaak het!



The R12.99 Special

We went to breakfast at a restaurant where the 'seniors' special' was two eggs, bacon, hash browns and toast for R12.99. 'Sounds good,' my wife said. 'But I don't want the eggs..'

'Then, I'll have to charge you R13.49 because you're ordering a la carte,' the waitress warned her. 'You mean I'd have to pay for not taking the eggs?' my wife asked incredulously.

'YES!' stated the waitress. 'I'll take the special then,' my wife said.. 'How do you want your eggs?' the waitress asked. 'Raw and in the shell,' my wife replied.

She took the two eggs home and baked a cake.

DON'T MESS WITH SENIORS!!!

WE'VE been around the block more than once!